

LE
VIRGILE
TRAVESTY
EN VERS
BURLESQUES,

De Monsieur SCARRON.
LIVRE TROISIÈME.



Suivant la Copie imprimée
A PARIS.

c l o l o c l .





A MONSEIGNEUR
 LE
 PRESIDENT
 DE MESME.



ONSEIGNEUR,



Quand je deurois faire souffrir vostre modestie, il faut que je descouvre à tout le monde vne action de generosité, que vous avez voulu tenir cachée. Quand feu mon pere fut obligé de quitter l'exercice de sa charge, vous adjoustastes aux paroles que la civilité fait dire, des offres bien plus solides que des paroles: il ne put respondre à vostre generosité, qu'en refusant, sans le regretter, ce que vous luy offriez de mesme. Depuis sa mort vous nous avez prote-

gez contre l'injustice qui accable le plus
souvent les enfans d'un premier lit ;
C'est vne obligation que nous vous
auons en commun mes sœurs & moy.
Et vous m'avez obligé depuis en mon
particulier, en donnant un peu de ce
temps que vous employez si utilement
au repos du public , à la lecture de mes
ouurages. Je n'aurois jamais esperé, que
ce que j'ay fait par diuertissement, deust
seruir à celuy d'un des plus considerables
Chefs de la plus celebre Compagnie de
l'Europe , & dont le merite est sans dou-
te, de quelque façon que l'on le conside-
re , au dessus de tous les emplois où l'on
puisse pretendre. Je ne diray point icy,
MONSEIGNEUR, que la fortune qui fait
bien souvent les choses contre sa con-
science, & qui ne se gagne pas par la ver-
tu, a tousiours esté enuieuse de la vostre.
Je sçay bien , que vous n'aymez pas les
louanges, quoique vous en meritez plus
que personne du monde , outre que la
plume Burlesque ne s'acquitteroit pas
assez bien d'un Panegyrique. Je vous de-
dieray seulement mon troisieme Livre
de Virgile. Je vous confesseray, que c'est
fort mal m'acquitter de tout ce que je
vous dois : & vous supplieray de croire,
que

E P I S T R E.

5

que si je n'estois pas en l'estat où je suis,
je n'aurois point de plus forte passion ,
que de vous tesmoigner autrement que
par des paroles, que je suis de toute mon
ame,

MONSEIGNEUR,

*Vostre tres-humble, tres-obeis-
sant, & tres-obligé serviteur*

SCARRON.

A 3

AU



AU LECTEUR.



*L*ecteur Chrestien ; car je ne suis pas assez vain pour croire que le Virgile Travesty aille jusqu'aux Infideles. Qu'ay-je à faire de te donner un Avant-propos, qui me cousteroit autant à faire que mon Liure. Si tu es de mes amis, tu excuseras ce qui te desplaira. Si tu n'en es pas, tous les Avant-propos du monde ne t'empescheroient pas d'exercer ta mauuaise humeur à mes despens. Je ne t'en feray donc point. Mais, ô sot que je suis, je ne prens pas garde que c'en est desia fait. O que l'impuissance humaine est grande ! Et que je ferois de belles reflexions sur ce que l'homme propose, & Dieu dispose, si j'en auois le loisir ! Adieu donc, Lecteur Chrestien, marchande mon Liure, achete-le, paye-le, lis-le, brusle-le, deschire-le, traite-le avec plus de mespris si tu veux.

Il n'en sera pour moy ny pis ny mieux.

Il me vient de souuenir, que j'auois fait un Avant-propos, pour me defendre d'un homme qui met tout en œuvre, soit qu'il ayme ou qu'il haïsse. Mais une personne de merite m'a prié de supprimer ce que j'auois fait contre un des plus supprimables hommes de France. Je le renguaisne donc, pour le desguaisner, s'il luy prend jamais enuie de faire contre moy à la plume.



L E
V I R G I L E
T R A V E S T Y .

L I V R E T R O I S I E S M E .

L'ARREST des Dieux ayant esté
Cruellement executé
Sur nostre miserable ville,
Nous pensasmes que faire gille,
Estoit le meilleur appareil,
Que nous pussions en caspareil,
Mettre promptement, faute d'autre,
Sur vn mal fait comme le nostre.
Qui fuit, peut revenir aussi :
Qui meurt, il n'en est pas ainsi.
Si Priam dans sa ville prise
Auoit perdu sa teste grise :
Nous autres ses humbles valets ,
Ayant bien eu les osselets,
Et les pauures mains écachées
Pour monstrier nos bourses cachées,
Eussions esté par ces meschans
Faits au moins Euesques des champs,
Et peut-estre mis sur la rouë,
A faire aux passans laide moïe.
Nous deliberaimes donc tous
De mettre entre les Grecs & nous,

Ne pouuans leur faire la guerre,
Vn notable espace de terre,
Et pour plus grande seureté
De l'eau salée en quantité.
Mon Pere qui dans chaque affaire
N'agit jamais en temeraire,
Et qui sçait cent secrets nouveaux,
Prit vn grand fas & des ciseaux,
Puis tourné vers l'vn des deux Poles,
Et prononçant quelques paroles,
Où personne n'entendit rien,
Quoy que chacun escoutast bien,
Et qu'il n'entendoit pas peut-estre,
Il nous dit qu'il alloit connoistre,
Où nous planterions le piquet:
Mais pourtant de son tourniquet
Fort peu de chose nous apprismes,
En suite de quoy nous nous prismes
A nous bastir de bons vaisseaux,
Pour nous exposer sur les eaux,
Et chercher quelque nouveau giste.
La flotte fut faite bien viste
Au pied d'Ida pres d'Antandros,
Nous fismes de nos gens vn gros,
Au temps que la triste froidure
Quitte la place à la verdure.
Puis de mon Pere conuiez,
Les Dieux ayant esté priez,
Nous montasmes sur nos galeres,
Non sans jeter larmes ameres,
De voir Troye où tout fut si bon,
N'estre plus rien que du charbon;
Cette belle ville de Troye,
Où j'auois vescu dans la joye,
Qui pis est en sortir vaincu,
Comme on dit, coups de pieds au cu.

Enfin

Enfin donc hommes, enfans, femmes,
Et tous nos Dieux sauuez des flammes,
Nous voila sur mer, loing du port,
A deux ou trois doigts de la mort:
Car entre gens flottans sur l'onde,
Et la mer, où se perd le monde,
Il n'est qu'un mur basti d'aix joints,
Large de trois pieds, plus ou moins.
Vne terre Thrace nommée,
Nation jusqu'aux dents armée,
Dont les gens sont tres mal-faisans,
Jurans Dieu, bartans païsans,
N'est gueres loing de la Phrygie;
Elle fut autrefois regie
Par Lycurge homme de renom,
Qui scauoit decliner son nom,
Et quelque chose dauantage,
L'Arithmetique, l'Arpentage,
Et faire entendre la raison
Au peuple qui n'est qu'un Oyson.
Ce païs aimoit fort le nostre,
Et qui toquoit l'un toquoit l'autre;
Ces Coupejarets Thraciens
Quand ils trouuoient des Phrygiens,
Leur ostoient humblement la toque.
Les Phrygiens au reciproque
Leur faisoient inclination
Avec grande deuotion:
Et puis ils s'entrefaisoient feste;
Se baisoient teste contre teste;
S'entredifans, je suis à vous,
Avec bras dessus, bras dessous.
C'est là que nostre flotte arriue
Ayant fait honneur à la riue,
Par l'aduis des maistres maçons,
Car des gens de toutes façons

S'estoient fourrez dans nos galeres,
Et jusqu'à des Apotiquaires,
Item meneurs d'ours, des Pedans,
Basteleurs, arracheurs de dens,
De Comediens vne bande,
Et des danseurs de sarabande.
Or donc ces maçons assemblez,
Et ceux de la flotte appelez,
Auxquels je disois, je vous prie,
Ou, plaise à vostre Seigneurie.
Aussi tost dit, aussi tost fait,
La chose fut mise en effet,
En place bien examinée
Ville par moy fut dessinée;
Puis en vertu du nom que j'ay,
Celuy des Troyens je changeay
En vn, qui terminoit en ades,
Comme qui diroit Eneades.
Or, comme vous pouuez penser,
Auparauant que commencer,
Il conuint à la Dionée
Nostre mere affectionnée,
Rendre l'honneur que meritoit
Dame qui tant nous assistoit:
Outre que les Dieux fauorables,
Par qui nous autres miserables
Auions pû, malgré fer & feu,
Tirer nostre espingle du jeu,
Nous eussent taxé d'auarice.
Pour auoir donc le Ciel propice,
Nous voulusmes offrir vn Veau
A Iuppin, faite d'un Taureau:
A Iuppin, qui dans le Ciel loge,
Qui gouuerne des Cieux l'horloge,
Et donne le froid & le chaud,
Souuent yn peu plus qu'il ne faut.

Vous

Vous allez entendre vne histoire,
Qui n'est pas trop facile à croire.
Assez pres de nous s'esleuoit
Vn terre, qui la mine avoit
D'estre la fosse de quelque homme
Qui faisoit là son dernier somme.
Ce petit terre estoit couuert
De myrtes au fueillage vert,
Et de jeunes cormiers sans nombre,
Qui faisoient vn ombrage sombre;
Pensant en prendre des rameaux,
Que je choisissois des plus beaux,
Afin d'en parer nostre hostie.
Vne liqueur rouge, sortie
De l'endroit tout frais ébranché,
Semblable à du sang espanché,
Me fit lors faire vne grimace,
Qui me defigura la face :
De tout mon cœur je priay Dieu,
Et promis aux Nymphes du lieu
Quatre ou cinq liures de chandelles,
Et d'en achepter des plus belles.
Puis je fis, comme de raison,
Au Dieu Mars tacite oraison.
C'est luy qui commande à baguete
Au peuple Thrace, comme au Gete.
Vn autre rameau je rompy,
Autre sang escouler j'en fy,
Et tout autant que j'en deschire,
Tout autant de sang chaud j'en tire.
Enfin, en ayant bien tiré,
L'arbre ayant comme soupiré,
Et sa perruque secouée,
Me dit d'une voix entouée
Ces mots, dont j'eus en verité,
Peu s'en salut, l'esprit gasté.

Pourquoy diable, Seigneur Enée,
 Vostre main s'est-elle acharnée
 Sur le corps d'un de vos amis?
 Si j'estois de vos ennemis,
 Encor auriez-vous tort de prendre
 Plaisir à sang humain resandre.
 Voila qui n'est ny bon ny beau,
 De venir gaster un tombeau:
 Je suis le Prince Polydore,
 Pour vne raison qu'on ignore:
 Mais je m'imagine pourtant,
 Que c'est pour quelque argent contant
 Que j'auois dans vne ceinture,
 Un Tyran d'auare nature
 M'a mis trop tost au rang des morts,
 Et fait un crible de mon corps.
 Ma pauvre chair de dars percée,
 Sous cette terre ramassée
 Reposoit assez doucement:
 Vous estes venu sottement
 Rompre de vos mains violentes.
 Mes pauvres branches innocentes;
 Vous m'avez tout défiguré,
 Du sang que vous m'avez tiré,
 Ma demeure est toute rougie.
 Arrêtez donc l'hémorrhagie,
 Et si vous n'en estes content,
 Le diable vous en fasse autant:
 Mais plustost, si vous estes sage,
 Fuyez cet auare riuage,
 Et remontez sur vos vaisseaux,
 Sans plus rompre mes arbrisseaux.
 Ainsi parla le dolent tige.
 A cet effroyable prodige
 D'un pied ma face s'allongea,
 Et dans mon corps mon sang figea.

Peut-estre ignorez-vous encore,
Quel homme estoit ce Polydore.
Il estoit fils de nostre Roy:
Ce bon Prince remply d'effroy,
Quand sa ville fut assiegée,
Crut qu'elle seroit rauagée,
Il enuoya son cher enfant,
Et, sur le dos d'un Elephant,
Son thresor au Tyran de Thrace.
Mais voyez la meschante race,
Quand il vit Priam mal-heureux,
Il cessa d'estre genereux.
Le perfide tourne casaque,
Et ce pauvre innocent attaque,
Comme il ne songeoit à nul mal:
Il n'est pas un pire animal,
Qu'un traistre quand il nous fait feste,
Puis apres cette male beste
De ce jeune homme qu'il tronqua,
Le riche thresor escroqua.
Mais que ne fait point entreprendre
L'insatiable faim de prendre!
Le discours du triste arbrisseau
M'auoit fait frissonner la peau,
Quand sa harangue fut finie,
Ma face qu'elle auoit ternie,
Reprit aussi-tost sa couleur,
Et mon corps glacé, sa chaleur.
L'enuoyay viste à ma galere
En aduertir Monsieur mon Pere,
Par lequel il fut resolu,
Qu'on feroit au tombeau pollu
Un sacrifice salutaire:
Il ne fut pas long-temps à faire,
Lès Damoiselles d'Ilion
Firent longue ululation.

Et si long-temps qu'elles voulurent,
Pleurèrent le mieux qu'elles pûrent.
On couvrit le lieu de cyprés,
On y respandit du lait frais,
Qu'on tira d'une vache noire,
Dont but quiconque en voulut boire.
Mon pere fit vn court sermon,
Qui ne fut ny mauuais ny bon.
Les branches que j'avois cassées,
Avec soin furent ramassées,
Et rejointes à l'arbrisseau,
Dont il parut deux fois plus beau,
Avec rubans de couleur bleüe.
Nous nous prîmes tous queüe à queüe,
Et couronnez de branches d'If,
Chantans tout bas, d'un air plaintif.
Nous regagnâmes nos galeres,
Puis poussez par des vents prosperes,
Esloignâmes, bien esbays,
Cet abominable pays.
Le Roy des Deïtez humides,
Et la mere des Nereïdes,
Possèdent moitié par moitié,
Sans en estre en inimitié,
Vne Isle dans la mer Egée,
Au blond Phébus fort obligée,
Car de flottante qu'elle estoit,
Et que le vent par tout portoit,
Cet illustre fils de Latone
L'a jointe à Gyare, & Mycone.
En ce lieu par le vent portez,
On nous fit cent ciuilitiez.
Anius Roy de l'Isle, & Prestre,
Ne tarda point à reconnestre
Mon Pere son ancien amy,
Quoy que par le sort ennemy

Sa personne fust devenuë
 En estat d'estre mesconnuë.
 Le bon Seigneur nous hebergea,
 Offrit à manger, on mangea
 Tout ce qui fut mis sur la table,
 Et si but- on au preallable.
 Ayans tous largement repû,
 A dire bouche que veux- tu?
 Nous nous rendismes dans le Temple,
 Afin de donner bon exemple.
 Si tost que prosterné j'y fu,
 Je dis le plus haut que je pu :
 Grand Apollon, Dieu debonnaire,
 Pren pitié de moy pauvre haire,
 Et de ceux que tu vois icy,
 Qui sont pauvres haires aussi.
 Pren pitié de la gent Troyenne,
 Fais en sorte qu'elle deuienne,
 Nonobstant sa calamité,
 Tout ce qu' elle a jamais esté.
 Dieu dont la barbe est si bien faite,
 Procure- nous une retraite,
 Mene- nous bien viste , & bien droit,
 En quelque bien- heureux endroit,
 Où nos femelles vagabondes,
 Autant que lapines secondes,
 Puissent promptement remplacer
 Ceux que le fer a fait passer.
 Nous sommes seuls de nostre ville,
 Eschappez de la main d'Achille,
 Et des Grecs, comme tu sçais bien,
 Qui ne valurent jamais rien.
 Dy- nous nostre bonne auanture,
 Mais dy- nous la sans imposture,
 Et sans en donner à garder.
 Tu te plais souvent à bourder:

Si t'ay pense estre icy le mesme,
Je pourray bien sans grand blasphemé,
Te faire passer en cent lieux
Pour le plus grand menteur des Dieux.
Aurons-nous paix, aurons-nous guerre?
Sera-ce par mer, ou par terre?
Ceux avec qui nous la ferons,
Sont-ils bonnes gens, ou larrons?
Ou si nous rebastirons Troye,
En grand repos & grande joye?
Ou s'il faudra jouer des mains
Avec des peuples inhumains?
O digne inuenteur de la lyre,
Qu'à bon droit tout le monde admire,
Qui premier a fait des Sonnets,
Et fait parler des sanfonnets:
Par ta sœur, madame la Lune,
Cette agreable claire-brune,
Qui va de nuit comme vn lutin,
Dy-nous quel est nostre destin:
Sans te faire tirer l'oreille:
Et je promets, à la pareille,
De t'offrir à ce renouveau
Vne vache blanche & son veau,
Et mesme de doubler la dose,
Si l'offrande est trop peu de chose,
Enfin je te régaleray,
Comme il faut, ou je ne pourray.
Les derniers mots de ma harangue
Estoient encore sur ma langue,
Quand en l'air le foudre gronda,
Et fit bien fort bredi breda.
Esclairs luisans comme chandelles,
M'éblouirent les deux prunelles:
Le saint trépied trois fois rotta.
Et le laurier sacré frotta.

Ses branches l'une contre l'autre.
J'eus recours à la Patenostre,
Sur le visage prosterné.
Mais je fus bien plus estonné,
Lors que j'entendis le tonnerre,
Qui grondoit aussi dessous terre,
Des loups qui tristement hurloient,
Et des ours qui se querelloient :
Mais lors que le Temple fit mine
De faire un saut comme une mine,
Je pensay bien estre au tombeau :
J'eus beau crier, tout beau, tout beau,
Les murs du Temple s'esbranlerent,
Et jusqu'aux fondemens tremblèrent.
Je souhaitay d'estre dehors,
Cent coups de baston sur le corps.
Mais cette mal plaisante aubade
Ne fut enfin qu'une algarade.
Du trepied sacré s'exhala
Une voix qui cria, paix là.
On se tut, vous le pouvez croire.
Voicy, si j'ay bonne memoire,
Ce que nous dit le sieur Phébus,
En mots clairs, & non par rebus.
Pauvres Troyens, qui sur la terre
Avez eu longue & rude guerre,
Et qui n'en aurez moins sur mer,
Bien vous prend de sçavoir ramer :
Ramez donc de si bonne sorte,
Que la mer à la fin vous porte
Vers la terre, d'où sont sortis
Tant legitimes que mestis,
Vos ayeux tant hommes que femmes,
(Dieu vueille bien avoir leurs ames.)
Je ne puis parler de leur mort,
Que je ne m'afflige bien fort.

C'est

C'est là que la race d'Enée,
Après longs trauaux couronnée,
Verra ses enfans triomphans,
Et les enfans de ses enfans.
A ces mots chacun avec presse,
Se demandoit, où est-ce? où est-ce?
Où prendre cet heureux climat?
Où nonobstant l'eschec & mat
Qu'a receu nostre pauvre Troye,
Nous pourrons en soulas & joye
Remplacer les pauvres Troyens,
Dont les corps sont mangez des chiens.
Mon Pere se grattant la teste,
S'escria, le suis vne beste,
Ou je pense auoir rencontré
Le lieu par l'Oracle monstre,
Où nous deuons viure à nostre aise.
Mais je me tais, ou qu'on se taise;
Quelqu'un encore chucheta,
Mais enfin chacun escouta.
Puis mon Pere par vn soufrire
Donnant la grace à son bien dire,
Nous dit avec autorité:
I'ay fueilleté, refueilleté,
Comme on sçait, toutes nos Chroniques,
Aussi veritables qu'antiques:
Or est-il qu'en mes jeunes ans,
Je pense auoir trouué dedans,
Que d'une Isle, Crete nommée,
Pour ses cent villes renommée,
Nos predecesseurs sont sortis,
Masles, femelles & petits.
Teucer menoit la carauane
Dans vne superbe tartane,
Et suiui de ses Candiens
Occupa les bords Rhetiens.

Pergame n'estoit point encore ;
Chacun y viuoit en pecore ;
Et sous terre au pied des costaux,
Les gens logeoient comme brutaux :
De là vint que tant on reuere
Des Dieux la mere, ou' la grand' mere,
Cybele avec tous ses chastrez,
D'Ida les mysteres sacrez,
La folle troupe Corybante,
Hippomene & son Atalante
Au sacré char assuiettis,
Pour auoir creu leurs appetits.
Mais quoy que lion & lionne,
Qui ne mordoient pourtant personne.
Courage donc, mes chers amis,
Courons à ce pays promis,
C'est là que Phébus nous appelle ;
Je veux bien que l'on me flagelle ,
Si nous n'y sommes dans trois jours ,
Quoy qu'ils soient encore bien courts.
Mais deuant, par des sacrifices,
Rendons-nous les grands Dieux propices.
Car souuent la mer & les vens
Font enrager les pauvres gens.
Ainsi parla mon pere Anchise,
Et puis sans sortir de l'Eglise,
A Neptune le Dieu del'eau,
Tout ainsi qu'à Phébus le beau,
Deux beaux grands taureaux nous brûlasmes,
Et puis apres nous regalasmes
L'hyuer, d'une noire brebis,
Et pour qu'il soufflast pro nobis,
C'est à dire au cul du nautre ;
D'une blanche le doux zephyre,
Vent qui ne fait jamais sur mer
D'action qu'on puisse blasmer.

En ce temps-la la Renommée,
Qui souuent est mal informée,
Et n'enrage pas pour mentir ,
Faisoit hautement retentir
Vne nouuelle d'importance,
Que pour aymer trop la finance,
Et pour auoir trop imposé
Sur son pauvre peuple espuisé ,
La populace mutinée
Au Capitaine Idomenée
Auoit fait affront solennel
En son Royaume paternel:
Si bien que le Tyran de Crete
Auoit deslogé sans trompette,
Sans dire adieu jusqu'au reuoir.
Certes nous ne pouuions auoir
Occasion plus fauorable,
Et c'estoit chose vray-semblable,
Que mon pere auoit deuiné
Le pays par les Dieux donné,
Qu'on y receuroit avec joye
Les pauures exilez de Troye,
Puis que dans ce païs promis
On mal-traittoit nos ennemis.
Nous quittasmes donc Ortygie,
La flotte conduite & regie
Avec grande adresse & grand art ,
Vola sur mer comme vn trait d'arc.
Nous vismes Naxos, dont les vignes
Ont rendu les costaux insignes,
La petite isle Olearos,
Les isles Cyclades, Paros,
Paros fameuse pour ses marbres,
Et Donyse couuerte d'arbres,
Et d'autres lieux de cette mer ,
Qui ne valent pas le nommer.

Les matelots, qui dans la Crete
Esperoient bien-tost leur rerraite,
Pouffoient mille cris esclattans,
Se voyant aidez du beau temps.
Les vents à souhait de nos voiles
Faisoient bander toutes les toiles,
Enfin le Ciel nous secourut
Si bien, que la Crete parut :
Où nostre flotte mise à terre
Ne se souuint plus de la guerre.
Je me mis d'abord à bastir,
Et terre à chacun départir,
Je nommay la ville Pergame,
Nom qui remit la joye en l'ame
De nos Troyens desesperez
Des maux qu'ils auoient endurez.
Je fis de beaux discours en prose,
Afin que deuant toute chose
On trauaillast à la cité,
Et pour plus grande seureté,
Qu'on bastist vne citadelle,
Aussi forte que la Rochelle.
Je fis tirer nos nefz du port,
Que l'on mit à sec sur le bort.
Tous les jours je rendois justice,
Ou trauaillois à la police :
Je visitois les bastimens,
Et faisois force reglemens :
Je mariay garçons & filles
Pour mieux conseruer les familles :
Je fis planter des espalliers,
Non pas pour vn, mais par milliers,
Comme aussi des arbres par lignes,
Semer du bled, planter des vignes,
Sans oublier force melons,
Qui sans doute eussent esté bons,

Car j'en auois receu la graine
D'un Gentil-homme de Touraine.
Bref tous ces preparatifs-la
Promettoient assez, quand voila,
Par vne maudite influence,
Qu'une maligne pestilence
Prit les pauvres Troyens en but,
Et leur fit auoir le scorbut,
Dont helas! la pluspart moururent:
Item nos pourceaux ladres furent,
Nos brebis eurent le claueau,
Et tous nos cheuaux le morueau,
Nos poulles eurent la pepie,
Dont plusieurs perdirent la vie,
Les autres casserent leurs œufs:
Nous perdismes vaches & bœufs
Par le defect du pasturage:
Plus de beurre, plus de fromage,
Aux champs de l'un à l'autre bout
Les chenilles mangerent tout:
Du Soleil la terre embrasée,
Faute de pluye & de rosée,
Se fendit en plusieurs endrois:
Les arbres dans les vallons frois,
Comme en la plaine descouuerte,
Perdirent leur perruque verte,
Et dans les jardins tout fut cuit:
Point de champignons, point de fruit,
Car la terre seiche & bruslante
Ne produisit herbe ny plante.
Enfin par la peste & la faim,
Sans vin, sans eau, sans chait, sans pain,
Nostre maudite destinée
S'en alloit estre terminée,
Et dans ce mal-heureux climat
Nous recevions eschec & mat.

Mon pere, le prudent Anchise,
Mouillant de pleurs sa barbe grise,
De regret de finir ses jours,
Nous exhorta par vn discours,
Aussi triste qu'une elgie,
De retourner dans Ortygie,
Pour y prier le blond Phébus
De nous vouloir tirer d'abus,
Et sans barguigner, nous apprendre
Si nous n'auions plus qu'à nous pendre,
Ou dans quelle contrée enfin
Nos infortunes prendroient fin.
La nuit brune, sœur d'un blond frere,
Auoit noircy nostre Hemisphere,
Tout dormoit en cét Vniuers,
Excepté les faiseurs de vers,
Les forciers, noïeurs d'esguillettes,
Les chats-huants & les choïettes,
Les plaideurs & les loups garoux,
Les amoureux, & les filoux.
I'estois couché mal à mon aise,
Entre la puce & la punaise:
La Lune avec beaucoup d'esclar,
Illuminoit tout mon grabat,
Perçant de ses rais ma fenestre,
Quand je vis deuant moy parestre
Nos Dieux, par moy du feu sauuez,
Et depuis tousiours conseruez:
Ie les vis, les Dieux de Pergame,
Ie vous le jure sur mon ame,
I'en jurerois bien sur ma foy,
Ie les vis, comme je vous voy,
De mes deux yeux, & non en songe,
Moy qui n'ay jamais dit mensonge.
Certes, si jamais je le fus,
Tant d'honneur me rendit confus:

L'un d'eux pour tous prit la parole.
 Que Maistre *Aeneas* se console,
 Me dit-il, nous sommes icy
 Exprés pour chasser son soucy :
 Qu'il n'aille point vers *Ortygie*
 Offrir au blond *Phébus* bougie,
 Nous luy dirons la verité :
 Du Dieu qu'il auroit consulté,
 Il n'en sçauroit pas dauantage.
 Il n'a donc qu'à prendre courage;
 Ville par les siens se fera,
 Qui le monde assujettira :
 Et ses enfans, estranges sires,
 Feront litiere des Empires,
 Et jouieront des Potentats,
 Comme des souris font les chats.
 Leur pouuoir n'aura point de bornes.
 Qu'il quitte donc ces pensers mornes,
 Qui luy font perdre le sommeil.
 Il a pris *Paris* pour *Corbeil*,
 Et n'est pas vn bon Interprete,
 Quiconque vous a dit, qu'en *Crete*
 Il falloit vistement bastir ;
 Il faut bien plustost en partir,
 Et gagner la terre promise,
 Où bien-tost, par nostre entremise,
 Vous jouirez d'vn grand repos,
 Les Dimanches aurez campos,
 Et n'aurez quasi rien à faire,
 Qu'à rire & faire bonne chere.
 Ce païs est gras & fertile,
 Dont les gens ont l'esprit subtil,
 Et quoy que joueurs de guiterre,
 Sont pourtant bonshommes de guerre.
 Ce païs, aux temps anciens,
 Fut celuy des *Oenotriens*,

Depuis

Depuis cette terre jolie,
D'Italus fut ditte Italie :
Et c'est ce païs entendu
Par le saint Oracle rendu :
D'où Dardanus nostre grand-pere,
Avec Iasius son frere,
Suiuy de ses Italiens,
Vint loger chez les Phrygiens.
Leuez-vous donc tout en chemise,
Allez trouuer le vieil Anchise,
Et luy dittes la chose ainsi,
Que nous vous l'auons ditte icy :
Et qu'il faut gagner la guerite,
Et chercher vistement Corite
Dans le païs Ausonien.
Iupiter, du bord Candien
Vous defend à tous la demeure,
Cherchez-en donc vne meilleure.
Après ces grands discours tenus,
Tout ainsi qu'ils estoient venus,
Les Dieux tutelaires sortirent.
Certes mes sens ne se mespirent,
Car je ne dormois pas alors,
Je les vis des yeux de mon corps,
Et reconnus bien leurs visages,
Et leurs chefs couuerts de bandages.
Certes à cette vision
Je sentis grande émotion :
Les poils de mon chef se dresserent,
Et mes pores sueur pisserent ;
Je deuins froid comme vn glaçon,
Vestu d'vn simple calleçon,
Je fis vne courte priere,
Car longue oraison ne vaut guere,
Et par forme d'oblation,
Je fis suffumigation.

Cela fait, & de bonne sorte,
I'allay faire bruit à la porte
De mon Pere Anchise endormy,
Qui m'ouurit grondant à demy :
Je luy contay toute l'affaire,
Lors l'équivoque deuint claire,
Et dans nos ayeux ambigus
Il vit aussi clair qu'un Argus.
O mon fils, me dit-il, j'ay honte
D'estre cause de ce mesconte,
Et je dois estre bien mocqué,
De m'estre tant équivoqué.
Cent fois me l'auoit dit Gassandre,
Si j'eusse eu l'esprit de l'entendre,
Mais de folle je la traittois,
Et moy-mesme le fou j'estois.
Qui diable, à moins qu'estre vne grue,
Chose tant estrange auroit cruë,
Et que les peres des Troyens
Fussent issus d'Italiens,
Et que dans si loingtaine terre
Nous, pauures restes de la guerre,
Pussions vn jour trouuer maison?
Certes j'auois quelque raison.
Mais puisque les Dieux nous le disent,
Mal-heur à ceux qui les mesprisent,
Obeyssons leur promptement :
Aussi bien l'establissement
Qu'en cette isle nous voulions faire,
N'esproue qu'un succez contraire.
Ainsi le bon vieillard parla :
Chacun fut d'accord de cela,
Et sans differer dauantage,
De plier vistement bagage.
Pas plus tard que le lendemain,
Au départ chacun mit la main,

Et

Et nostre ville commencée,
Sans regret d'aucun fut laissée:
Nous y laissasmes neantmoins
Ceux de nous qui valoient le moins,
Et qui n'estoient parmy les nostres
Que l'incommodité des autres.
Nous voila donc encor en mer,
Derechef reduits à ramer.
Quand nous fusmes loing du riuage,
Sans plus voir ville ny village,
Mais seulement le Ciel & l'eau,
Logez en vn fresse vaisseau,
Chacun de nous, en sa pensée,
Regretta la terre laissée,
Car la mer ordinairement
Est vn dangereux element :
Qu'ainsi ne soit, sur nostre teste
Je vis grand signe de tempeste,
Vn air espais qui s'amassoit,
Et nostre flotte menaçoit.
La menace ne fut point vaine,
En vn instant l'humide plaine,
De pacifique qu'elle estoit,
Par vn grand vent qui l'agitoit,
Vit changer ses vagues enflées
En plusieurs montagnes salées :
Le jour tout à coup deuint nuit,
Le tonnerre fit vn beau bruit:
Nos pauvres vaisseaux en déroute,
Sans pouuoir connoistre leur route,
Furent jettez qui çà, qui là,
L'onde avec le Ciel se mesla.
Le bon pilote Palinure,
Comme vn chartier embourbé, jure
Qu'il est au bout de son latin.
Trois jours cet orage mutin,

Et trois nuits, berna nos nauires :
Ie n'en ay point passé de pires,
Et nous eussions passé le pas,
Car les vents ne se joüioient pas :
Mais par bon-heur ils se broüillèrent,
Et l'un l'autre se querellerent,
Tellement que ces maistres fous,
Sans penser dauantage en nous,
Mais bien à se faire la guerre,
Nous poufferent deuers la terre :
Tout aussi-tost qu'elle parut,
Tout le monde aux rames courut,
Et les voiles furent calées ;
Puis fendant les ondes salées
A grands coups de nos auirons,
Nos vaisseaux, autant plats que rons,
Gagnerent le prochain riuage,
Chacun riant de bon courage.
Cette Isle où le vent nous poussa,
Est depuis quelque temps en ça
D'un nom Grec , Strophade nommée,
Et cette mer fort diffamée.
Car trois monstres d'Enfer sortis
En ont chassé grands & petits,
Depuis que ches le Roy Phinée
Rude chasse leur fut donnée
Par deux Argonautes aislez ;
Adroits en pareils démeslez.
Ce sont les maudites Harpyes,
Aussi larronnelles que pies,
Dont l'aînée a nom Celanon,
Un vray visage de guenon :
Ses deux sœurs sont autres guenuches,
Toutes trois estomachs d'austruches,
Et qui n'ont pas plustost mangé,
Que leur appetit enragé,

Tout

Tout autre que la faim canine,
 Leur liure vne guerre intestine.
 Elles ont toutes le museau
 De la femme d'un damoiseau,
 C'est à dire vne damoiselle,
 Chacune au dos sa paire d'aïlle,
 Les pattes en chapon rosti,
 Le nez long, le ventre applati :
 Toutes trois ont longs cols de grue,
 Et longues queue's de morue,
 Les tetons flasques & pendans,
 Et chacune deux rangs de dents.
 Là si tost qu'arriuez nous fusmes,
 Chèvres & bœufs nous apperceusmes :
 Qui passoient sans estre gardez,
 Ils ne furent point marchandez :
 Sur eux d'abord nous nous ruasmes,
 Les prismes, & les esgorgeasmes,
 Non sans auoir fait compliment
 A l'Empereur du firmament.
 Car ce butin sans son auspice,
 Ne nous eust pas esté propice.
 En moins de rien l'on apresta
 Le festin, qui peu nous cousta.
 Comme nous commencions la feste,
 Aussi viste que la tempeste,
 Les trois monstres dont j'ay parlé,
 Ces Harpyes au dos aïlé,
 Se ruerent sur nos viandes :
 Par ces vilaines, ces gourmandes,
 Ce qui fut seulement senty,
 Fut aussi-tost empuanty,
 Tant leur haleine est dangereuse,
 Soit pour auoir quelque dent creuse,
 Ou que leur ventre mal nourry
 Pousse dehors vn air pourry.

Ces insatiables donzelles,
Faisant la guerre à nos escuelles,
S'entre rauissoient chair & pain,
Tant enragée estoit leur faim :
Et ce que je n'aurois pû croire,
Chantoient quelques chansons à boire.
Lors je fis mettre le couuert
Sous vn rocher creux, & couuert
De quantité d'arbres sans nombre,
Où l'on pouuoit manger à l'ombre.
Aussi tost que l'on eut seruy,
Tout aussi tost tout fut rauy
Par ces franches escornifleuses :
O bon Dieu les braues mangeuses!
Le chancre pres d'elles n'est rien ,
Quoy qu'un chancre mange tres-bien.
Mais les porques desgobillerent,
Et toutes nos napes soüillèrent:
Et cette insolente action ,
Estrange à nostre nation,
Me mit tout de bon en colere;
Après auoir fait bonne chere,
Elles se deuoient contenter :
Mais ainsi nos napes gaster,
Cela passoit la raillerie,
Et c'estoit trop d'effronterie
A ces parasites d'oyseaux,
Plus mal-faisants que des corbeaux.
L'ordonnay donc qu'on prist les armes,
Pour leur donner quelques alarmes,
Tous nos gens en furent contents,
Et cacherent en mesme temps
Sous l'herbe dagues & rondelles,
Afin de nous deliurer d'elles.
Nous fîmes, pour les attirer,
Vn autre repas preparer.

Prés de là nous nous escartâmes,
 Et soigneusement les guettaâmes.
 Les trois goinfressés aussi-tôt
 Qu'elles sentirent nostre rost,
 S'en reuinrent la gueule fraische,
 Afin d'en faire la despesche :
 Misenus du haut d'un rocher
 Se mit aussi-tôt à hucher,
 Et de sa trompe entortillée,
 A nostre troupe appareillée
 Donna le signal de sortir.
 Faisant nos armes retentir,
 Nous commençâmes la bataille,
 Chamaillant d'estoc & de taille :
 Sans se foucher de nos coups,
 Elles se moquerent de nous,
 Et pourtant quitterent la place.
 Vne d'entr'elles, maigre en face,
 Celano, se mit sur un roc,
 En la posture qu'est un coq
 Sur le clocher d'une paroisse,
 Et nous donna bien de l'angoisse
 Par ces mots que j'ay retenus.
 Ha vraiment, beau fils de Venus,
 Vous estes un plaisant visage :
 On disoit que vous estiez sage,
 La peste vous casse le cou,
 Vous n'estes qu'un dangereux fou :
 Vostre Altesse, pour un grand Prince,
 A, me semble, le cœur bien mince,
 D'armer contre nous jusqu'aux dents
 Un gros escadron de ses gens.
 Quel droit ont-ils sur nostre terre,
 Pour nous y faire ainsi la guerre ?
 Les enfans de Laomedon,
 Au lieu de demander pardon,

D auoir pris nos bœufs & nos vaches,
Pour faire encore les brauaches,
Armez comme des jacque mars,
De rondelles, dagues, & dars,
Et conduits par leur Capitaine,
Qui seul en vaut vne centaine,
Ils ont repris vn peu de pain
Sur trois filles ayant grand faim,
Action digne de l'histoire !
Vn autre homme amy de la gloire,
Au lieu de leur raur leur bien,
Leur auroit fait offre du sien.
Escoutez, escoutez, beau sire,
Ce que j'ay charge de vous dire
De la part de saint Apollon.
Après vn voyage bien long,
Le fils du vieux resueur Anchise
Trouuera la terre promise :
Mais il aura bien à patir,
Deuant que d'y pouuoir bastir,
Et sa misere sera telle,
Que mainte assiette, & mainte escuelle,
Faute de meilleur aliment,
Seront par luy gloutonnement,
Et par ses soldats deuorées.
Après ces choses proferées,
Elle nous fit vn pied de nez,
Et nous laissant bien estonnez,
La mal-plaisante Prophetesse
S'enuola de grande viffesse.
En vn autre temps j'aurois ry,
Alors que la chauue-soury
Nous fit cette laide grimace :
Mais alors chacun sur ma face
Put voir vn grand estonnement;
Et tous mes gens pareillement,

N'eurent

N'eurent pas lors le mot pour rire.
 Quelques-vns se mirent à dire,
 Qu'il falloit les desdommager,
 La guerre en prieres changer,
 Jusqu'à faire des sacrifices,
 Afin de les auoir propices,
 Soit qu'elles fussent des oyseaux,
 Hantans la terre ou bien les eaux,
 Soit monstres, ou Vierges celestes,
 Ou bien des infernales pestes.
 Mon bon pere ostant son bonnet,
 Dit d'un ton de voix clair & net :
 Grand Dieu, qui vois nostre misere,
 Conserue le fils & le pere,
 Pren pitié d'Anchise le vieux,
 Protege Æneas le pieux :
 Fais que cette estrange menace,
 Plus de peur que de mal nous face :
 Grand Dieu miserere nobis,
 Mourir de faim, il n'est rien pis.
 Entre nous tous il n'est personne;
 De qui la dent soit assez bonne
 Pour pouuoir assiettes mascher,
 Oüy bien du pain ou de la chair :
 Et moy chetif qui n'en ay qu'une,
 Quelle seroit mon infortune ?
 Que ferois-je en cet accident
 Avec vne meschante dent ?
 Et dent qui me branle en la bouche,
 C'est à moy que la chose touche.
 Ha grand Dieu! destourne l'effet
 De la menace que nous fait
 Ce hibou, ce monstre squelette.
 Estre reduit à son assiette,
 Faute de viande & de pain ?
 Mascher du bois ou de l'estain ?

Ha! cette menace cruelle
Me trouble toute la cervelle,
Il ne nous peut arriuer pis,
Grand Dieu, misereere nobis.
Ayant fini cette priere,
Que je vous redis toute entiere,
Nous regagnasmes nostre bord,
La flotte se mit hors du port,
Chacun resuant à la menace
De la donzelle chiche face;
Vn vent de terre qui souffla
A souhait nos voiles enfla.
Lors en mer nous nous eslargismes.
La premiere Isle que nous vismes,
Ce fut celle de Zacynthos,
En suite Samé, Neritos,
Dulichie, & l'Isle fameuse,
Mais à nos Troyens odieuse,
Ithaque país d'Vlysses,
A qui doit tout son bon succez
La flotte qui vint de Mycene;
En eust il la fiévre quartaine.
Le vent si bien nous secourut,
Qu'enfin Leucate nous parut,
Et puis d'Apoïlon le saint Temple,
Qu'en mer avec crainte on contemple,
Où nos nauires prirent port,
Car la mer nous ennuyoit fort.
L'on fit à Iuppin sacrifice,
Et puis tant pour faire exercice,
Que pour celebrer Actium,
A la maniere d'Ilium:
Nous fismes feste solennelle.
Je pris ma robe la plus belle,
Je mis vn prix pour les luteurs,
Pour les danseurs, pour les faiseurs,

Pour

Pour l'escrime à la dague seule,
Colin-maillart, & pet en gueule.
Pendant le Roy des saisons
Auoit fait ses douze maisons :
Desia l'hyuer porte-mitaine ,
Faisoit sur mer sentir l'haleine
Des impetueux Aquilons,
Et donnoit mules aux talons.
Nostre troupe estoit fort contente
D'auoir pu, contre son attente,
Passer le pais ennemy,
Sans trouuer ny Grec ny demy ,
Qui nous dist parole mauuaise :
Pour moy j'en estois rauy d'aïse :
Et pour nos ennemis fascher,
Je fis en terre vn pieu ficher,
Auquel au son de la trompette,
Auec deux grands clous de charrette
Je fis cloïer l'escu d'Abas,
Autresfois par moy mis à bas,
Puis j'y mis en lettre gottique
Cette inscription authentique ;
*Aneas prit avec grand cœur
Cet escu sur le Grec vainqueur-
Ma rodomontade ainsi faite,*
Je fis sonner pour la retraite.
Mes compagnons à qui mieux mieux,
Autant les jeunes que les vieux,
Chantans, pour se donner courage,
De fendre les eaux faisoient rage :
Dont j'eus, car je ramoïs aussi,
Le dedans des mains endurcy.
Nous vismes bien-tost Phéacie,
Et costoyasmes l'Albanie :
Enfin nous voguasmes si bien,
Que dans le port Chaonien

Je fis prendre terre à la flote.
Il couroit vn bruit dans Buthrote,
Qui grandement nous estonna,
Et tout ensemble nous donna,
Non pas pour vn peu, de la joye:
On nous dit, qu' Helenus de Troye,
De nous tous esclau tenu,
D'esclau, estoit Roy deuenu
Du Royaume de Neptolême,
Et qu' outre cette gloire extrême,
Il auoit le bon-heur encor,
Qu' Andromaque femme d' Hector,
Comme luy captiue emmenée,
Estoit à luy par hymenée
Conjointe à chaux & à ciment.
Je ne pûs attendre vn moment
A m' esclaircir de cette affaire,
Et comme vn bon parent, luy faire
Quelque congratulation,
Tant sur cette promotion,
Que pour auoir si braue espouse,
Laquelle en valoit dix ou douze.
Laisant ma flote & mes gens donc,
Impatient si je fus onc,
Je trouuay la Reyne hors la ville,
A sa queue vne grande file
De gens tous habillez de noir;
Pompe triste, mais belle à voir:
Elle faisoit l' anniuersaire,
Avec vn fort beau luminaire,
Aupres d' vn tombeau fait exprez,
Tout entouré de vert cyprez,
D' Hector: (Dieu vueille auoir son ame.)
Et cette venerable Dame
Auoit fait bastir ce tombeau
Dans vn bois, apres d' vn ruisseau,

Nommé

Nommé Simois, du nom du fleuve,
Qui les murs de Pergame abbreuve.
Elle pensa mourir d'effroy,
Quand elle vit mes gens & moy,
Et nos armes à la Troyenne;
Elle cria, qu'on me soustienne.
Je me sens les jarrets plier:
D'un costé vint un Escuyer,
Et de l'autre une Damoiselle,
Qui la soustinrent sous l'aisselle,
L'un & l'autre bien estonnez.
Elle me regardant au nez,
Et reconnoissant mon visage,
Tint ce déplorable langage:
Est-ce vous, mon cher Aneas?
Vous vois-je, ou ne vous vois-je pas?
Qu'avez-vous fait d'Hector de Troye?
Alors de tristesse & de joye,
Ses yeux se mirent à pleurer,
Et sa poitrine à soupirer.
Moy qui sçay pleurer comme un autre,
D'un seruiteur, & moy le vostre,
Interrompu de vingt sanglots,
Et luy marmottant plusieurs mots,
Qui n'auoient ny raison ny suite,
Tant mon ame estoit interdite,
Je taschois de la consoler,
Et ne faisois que bredouiller.
Enfin reprenant mon haleine,
Je luy dis avec grande peine.
Oüy, Madame, vous le voyez
Maistre Aneas, & l'en croyez.
Mais pour vous, ma tres-chere Dame,
Ayant esté d'Hector la femme,
Après auoir eu tel espoux,
Dites-moy, qu'est-ce que de vous?

Pyrrhus vous ayant emmenée,
Vous a-t'il prise en hymenée?
Ou si. De grace brisons-là,
Me dit-elle. En disant cela,
La bonne Dame deuint rouge
De honte qu'on l'estimast gouge:
Mais l'estre par nécessité,
Ce n'est qu'un peu l'auoir esté.
O Polyxene bien-heureuse,
Dit-elle apres, toute pleureuse,
Alors qu'on luy coupa le col,
Quand avec un honteux licol
On auroit terminé sa vie,
Encor luy porterois-je enuie:
Au lieu que seruir un soldat,
Qui le plus souuent n'est qu'un fat,
Qui vous a gagnée à la chance,
C'est une tres-piteuse chance:
Outre que quand on ne plaist plus,
Il vous vend pour un carolus.
Ma fortune a bien esté pire,
D'estre faite esclaue de Pyrrhe,
Esprit superbe, & sans repos,
Qui me battoit hors de propos;
Comme si j'eusse esté du plastre:
De plus, fils de l'acariastre,
Par qui mon mary fut vaincu,
Et son corps à l'escorche-cu
Traîné le long de vostre ville:
Action, ma foy, peu ciuile.
Quoy que mon corps soit bon & beau,
Il fut bien-tost saoul de ma peau,
Ayant passé sa fantaisie,
Sans que j'en eusse jaloufie,
Pour la Spartaine Hermione.
Il deuint quasi forcené

D'un

D'un amour qui n'eut point de bornes:
Oreste, qui sentit les cornes
Luy durcir les deux coins du front,
Ne put souffrir vn tel affront,
Et remply d'une rage extrême,
A mon galant de Neptolême,
Qui le vouloit faire cornard,
Il donna cent coups de poignard.
Par la mort de ce fou de Pyrrhe,
La belle moitié del'Epire
Fut offerte par grand bon-heur
Au sage Helenus mon Seigneur,
Qui me fait partager sa couche:
Sans faire la petite bouche,
A laquelle fait venir l'eau,
Ordinairement tel morceau,
Et pour lequel morceau l'on ose,
Bien plus que pour toute autre chose,
Du peuple qui luy presenta
Le diadème il accepta,
Dont j'eus vne joye infinie.
Lors il voulut que Chaonie,
Du nom de Chaon le Troyen,
Succedast au nom ancien:
Et fit faire vne citadelle,
Le mieux qu'on put, sur le modèle
D'Ilion, pour que l'aduenir
Du vray Pergame eust souuenir.
Or voila toute mon histoire.
Allons, mon cher hôte, allons boire:
Et me faites, chemin faisant,
Le recit, fascheux ou plaisant,
De vos auantures passées,
Et combien a de dents percées.
Iulus que vous aymez tant?
A propos, il n'est plus enfant.

Il est grand comme pere & mere:

A-r'il senti douleur amere

Quand il a perdu sa Maman?

Faittes-luy monstrier l'Aleman,

C'est vne langue fort en vogue.

Est-il d'un esprit doux ou rogue?

Tient-il de vous, tient-il d'Hector?

Le bon-homme vit-il encor?

Après demande sur demande,

Il luy prit vne douleur grande:

Ses yeux se mirent à pleuvoir,

Je luy presentay mon mouchoir,

Dont elle s'esluva la face.

Je me composay la grimace,

Quand je la vis pleurer ainsi,

Et taschay de pleurer aussi.

Mais jamais en jour de ma vie,

Quoy que j'en eusse grande enuie,

Je ne fus si dur à pleurer,

Dont je pensay desesperer.

L'estois en cet embarras, comme

Voicy venir à nous son homme,

Suiuy de cent hallebardiers,

Et d'autant de cranequiniars,

Dieu sçait s'il eut beaucoup de joye,

Quand il vit tant de gens de Troÿe,

Qu'il pensoit n'estre plus viuans:

Il salua tous mes suiuaus,

Et nous mena tous vers la ville.

Or comme il a l'ame ciuile,

Il me voulut faire passer:

Nous fîmes, comme on peut penser,

Force complimens à la porte,

Et ce fut de si bonne sorte,

Que faisans des saluts bien bas,

L'un priant, l'autre n'entrant pas,

Nous nous couchâmes sur le ventre;

Luy,

Luy, disant, Maudit sois si j'entre:
Moy, disant, Maudit sois aussi.
Mais nos gens nous voyans ainsi,
Nous prirent & nous emportèrent,
Les vns & les autres entrèrent:
Et lors cria Maistre Helenus,
Vous soyez les tres bien venus.
Me Troyens eurent grande joye
De voir cette petite Troye,
Et d'y remarquer le Xantus,
Pres duquel, battans ou battus,
Ils auoient joué de l'espée.
I'y reconnus la porté Scée,
De laquelle, la larme à l'œil,
Je baisay les gonds & le suëil.
Je fus receu dans cette ville,
D'une façon toute ciuile,
Les moindres gens de nos vaisseaux
Quitterent le séjour des eaux;
Onc ne fut telle mangerie,
Iusqu'à la moindre hostellerie:
De mon monde tout regorgea,
Chacun son saoulbut & mangea.
Dans le palais les plus notables
Furent sur magnifiques tables
Servis de mets tres-delicats;
Et pouuoient en prendre les plats,
Comme aussi les tasses dorées,
Nappes & seruiettes ourées.
Nous passasmes là quelques jours,
Que nous ne trouuasmes pas cours,
La tristesse de nous bannie.
Il n'est si bonne compagnie,
Qui ne se separe à la fin,
Je dis donc au sacré deuin,
Que le vent paroïssoit bien sage,
Et nous promettoit bon voyage;

Mais deuant que de le quitter,
 Que j'auois à le consulter,
 Pour m'esclaircir de quelque doute.
 Il me dit, Commencez, j'escoute.
 Je luy dis ces mots à peu près.
 Par vn commandement exprés
 Des Dieux & de la destinée,
 Ma troupe doit estre menée
 Dans le pays Ausonien.
 Là le pauvre peuple Troyen
 Doit auoir, apres sa misere,
 Vne fortune bien prospere,
 Et comme on dit, viure à gogo.
 Mais vne laide Celano,
 Vne malencontreuse Harpye,
 Comme si c'estoit estre impie
 Que de manger quand on a faim,
 M'a prédit, que faute de pain,
 J'aurois à manger mon assiette;
 Et la donzelle putrefaite
 Me menace de mille maux,
 Pour quelques chetifs animaux
 Par nous conquis de bonne guerre,
 Quand nous prîmes port en leur terre:
 I'en suis tout je ne sçay comment.
 Vous qui sçauiez parfaitement
 Le sens caché des Propheties,
 Qui connoissez bien les hosties,
 Comme aussi des oyseaux le vol,
 Qui pouuez descouurir vn vol,
 Fust-il le plus caché du monde,
 Vous en qui la sagesse abonde:
 Vous enfin sçauant jusqu'aux dens,
 Et qui voyez clair au dedans
 De la chose la plus obscure,
 Dittes-moy ma bonne aduenture.
 Ouy, de bon cœur je la diray,

Me

Me dit-il, ou je ne pourray.
Il demanda son escritoire,
Fit tuer vne vache noire,
Pour mieux tirer les vers du nez
Des esprits ainsi guerdonnez :
Puis apres faisant cent mysteres ,
Qui sentoient fort les caracteres
Dont on conjure les esprits,
Voicy ce que de luy j'appris.
Enfant de Venus la paillardes,
Le grand Dieu Iuppiter vous garde
De tout encombre, de tout mal,
Et de morsure de cheual.
Dire que vous ne valiez guere,
Quoy qu'enfant de bons pere & mere,
Cela ne vous appartient pas,
Car vous valez mille ducats.
Vous possederez l'Italie,
Le nier, c'est vne folie,
Puis que les Dieux vous l'ont prédit,
En douter, c'est estre maudit.
Je vous vai dire quelque chose,
Car vous dire tout, je ne l'ose,
Si je pensois faire autrement,
Iunon indubitablement,
Que je crains comme la tempeste,
Me viendrait bien lauer la teste ;
Puis les Parques l'ont defendu ,
Desquelles je serois tondu ;
Or vous sçavez que Parquerie
Entend fort mal la raillerie.
Je vous dis donc en premier lieu,
[Je parle de la part de Dieu).
Que cette retraitte promise
Est plus loing que vostre chemise,
Et n'est pas vn morceau bien prest,
Vous en ferez pourtant l'acquest:

Mais

Mais pour voir reüssir l'affaire,
Vous aurez bien des tours à faire
Le long du bord Sicilien,
Et du pays Ausonien :
Et puis vous irez en personne;
Et que cecy ne vous estonne,
Dans vn païs obscur & bas ,
D'où quand on veut, on ne sort pas:
C'est l'Enfer (qu'il ne vous déplaïse)
Mais vous en sortirez à l'aïse,
Par le moyen d'un certain sort.
Vous irez aussi prendre port
Dans l'Isle dangereuse d'Æe,
Où demeure Circé la fée:
Mais n'en ayez pas grand soucy,
Et sur tout, escoutez cecy.
Quand vous aurez bien la migraine
De voir vostre course si vaine,
Que vous serez tout confondu,
Et croirez que tout est perdu;
N'allez pas vous rompre la teste,
Ny vous tuer comme vne beste,
Ou vous pendre par desespoir :
Car vrayment il seroit beau voir
En vn gibet le fils d' Anchise,
Avec vne sale chemise :
Certes quand blanche elle seroit,
Sans doute elle vous messieroit;
Et quand on est là pour vne heure,
Toute sa vie on y demeure.
Quand donc vous aurez bien pleuré,
Et serez bien desesperé,
Ne jetez pas, mon cher Enée,
Le manche apres vostre coignée;
Vos traux sont là limitez;
Et qu'ainsi ne soit, escoutez.
Quand sur les bords d'un petit fleuve,

Qui

Qui la terre Italique abbreue,
Dont bien bourbeuses sont les eaux,
Vous trouuerez trente pourceaux,
Allaittez d'vne seule mere,
Benissez bien monsieur leur pere,
Qui sceut faire tant de cochons:
Regardez s'ils sont blancs & blonds,
Comme leur mere est blanche & blonde.
Car alors, en dépit du monde,
Et de tous les chiens d'enuieux,
Que vous auez dedans les Cieux,
C'est là que contre vostre attente,
Et vous, & vostre troupe errante,
Guere moins que la nef Argo,
Viurez vn long-temps à gogo.
Et quant à manger vostre assiete,
Que cela ne vous inquiete,
Puisque vous la digerez,
Alors que vous la mangerez:
Et quand elle seroit plus dure,
Le destin, qui de vous a cure,
Comme Apollon porte laurier,
Vous tireront de ce borbier.
Au reste, le long de la coste,
N'allez pas conter sans vostre hôte,
N'allez pas faire le nigaut,
Prenez-y garde, il y fait chaut,
Toute la contrée est Gregeoise,
Par exemple, la gent Locroise,
Qu'on appelle Naryciens,
Et puis les Salentiniens,
Sur qui commande Idomenée,
Dont la haine est enracinée
Contre le peuple Phrygien,
Et le grand chef Mélibéen,
Philoctete est dans Perilie,
Où sa demeure est estable. Estant

Estant eschappé de ces lieux,
Au grand Dieu qui régit les Cieux,
Vous ferez vn beau sacrifice,
Pour vous auoir esté propice ;
Et voicy ce que vous ferez
Alors que vous sacrifierez :
Couurez vostre face d'vn voile,
Ou de taffetas ou de toile,
Car il faudroit recommencer,
Si vous alliez, sans y penser,
Ietter les yeux sur vn visage,
Qui fust d'vne terre sauuage,
Et qui n'eust pas le nez tourné,
Comme vn homme à Pergame né:
Croyez cecy comme Euangile,
Et n'allez pas faire l'habile,
Intentant alteration.
C'est vn point de Religion
Particulier à tous les vostres,
Et qui n'est pas fait pour les autres.
Après force dangers courus ,
Lors que vous verrez Pelorus,
Prenez le chemin de l'escole,
Et n'allez pas en teste folle,
Choisir le chemin le plus court,
En ce destroit la, l'eau qui court
Est bien pire quel'eau croupie,
Iadis Sicile & l'Hesperie
N'estoient qu'vn país contigu,
Et formoient vn indiuidu.
Mais soit par le temps qui tout change,
Ou par l'eau, qui la terre mange,
Ou bien par quelque tremblement,
Ou plustost, je ne sçay comment,
Les deux terres se separerent,
Les flots entre deux se fourrerent,
Et depuis qu'ils s'y sont fourrez,

Ils ne s'en sont point retirez.
Ce fameux destroit de Sicile
Est gardé par Charybde, & Scylle:
Et ces deux Suisses du destroit,
Sont l'un à gauche, & l'autre à droit.
Charybde de son profond gouffre
Gobe les flots couleur de souffre,
Et puis trois fois les reuomit
Vers le Ciel, lequel en fremit.
Scylle ne bouge de son antre,
D'où l'eau sort, entre, ressort, rentre,
Taschant d'attirer les nochers
Dans les pointes de ses rochers:
Elle a le museau de pucelle,
Estomach à double mammelle,
Le reste du corps loup marin,
Et la queue ainsi qu'un dauphin.
Plustost que de la voir en face,
Il faut que vostre flotte face,
Costoyant Pachin, un grand tour:
Car dedans l'horrible séjour
De cette donzelle marine.
Et de sa cohorte canine,
Je me trompe, ou vous & vos gens
Passeriez fort mal vostre temps;
Et si vous me croyez fidele,
Et que Maistre Apollon reuele
A moy son seruiteur discret
L'art de deuiner un secret:
Je vous advertis, & pour cause,
De tascher, sur toute autre chose,
D'appaiser la Dame lunon,
De celebrer par tout son nom:
Luy faire souvent sacrifice,
Afin de la rendre propice.
Autrement tous vos vains efforts
Vous laisseront l'ame & le corps,

Et

Et sans elle, dans vostre affaire,
 Vous ne ferez que de l'eau claire.
 Et quand du bord Sicilien
 Vous gagnerez l'Italien,
 Au trauers des flots pleins d'escume,
 Et que vous serez dedans Cume:
 Si vous me croyez, allez voir
 La Sibylle dans son manoir.
 C'est vne vieille bien barbuë,
 Mais de grande science imbuë,
 Qui sçait faire tourner le sas,
 Et dont tout le monde fait cas:
 Vous verrez sa sombre cauerne
 Au milieu des lacs de l'Auerne:
 Elle n'en sort ny peu ny prou,
 Et vit comme vn vray loup-garou.
 Alors que quelqu'un l'interroge,
 Deuant la porte de sa loge:
 Dessus des fueilles elle escrit,
 Ce qu'elle apprend de cét esprit
 Qui luy reuele toutes choses:
 Mais deuant que ses portes closes
 S'ouurent avec grand vent, & bruit,
 Si le suppliant mal instruit
 Ne lit ces fueilles arrangées;
 Aussi-tost par le vent changées
 D'ordre & de situation,
 Tout se met en confusion;
 Pour auoir esté mal-habile,
 Mal satisfait de la Sibylle,
 Il s'en retourne aussi sçauant,
 Le nigant, qu'il estoit deuant.
 Or vous, n'allez pas par foiblesse,
 Soit que vostre troupe vous presse,
 Ou que le temps vous semble beau,
 Remonter dans vostre vaisseau,
 Auparauant que l'édentée

Ait esté par vous consultée :
Par ma foy vous gasteriez tout,
C'est vn demon, & haye au bout:
Vous sçaurez de fil en aiguille
De cette vieille & docte fille,
Qu'on croit n'auoir plus que la voix,
Les noms des peuples & des Roys
Qui font la nation Latine.
Oiiy, cette sorciere diuine
Vous dita comme il faut marcher
En tous vos desseins sans broncher,
Quelles gens vous feront la guerre
En cette bien-heureuse terre,
Et comment pour les bien frotter,
Vous aurez à vous comporter.
Allez, restaurateur de Troye,
Peu s'en faut que je n'en harmoye :
Allez anter, homme de bien,
Le Troyen sur l'Italien:
Et que vostre gloire immortelle
Monte jusqu'au Ciel sans eschelle.
Le Sage ayant ainsi parlé,
Dont j'eus l'esprit bien consolé,
Il me regala de l'espée,
Dont Polyxene fut frappée,
Comme aussi du pot à pisser,
Et de l'arbaleste à chasser
De Pyrrhus, de sa gibbeciere,
Et d'une belle cousteliere,
Dont la guaine estoit de cuir neuf,
Les manches d'un bel os de bœuf,
Et les cousteaux de fine trempe,
D'un fer d'hallebarde sans hampes,
Qui de rouille estoit vermoulu,
Quoy qu'il fust tout frais esmoulu;
D'excellente biere vne tonne;

Deux grands chaudrons faits à Dodone,
La demy-dent d'un elephant,
Et des babilles d'enfant,
Pour diuertir le fils Ascagne:
Vne poëlle à griller chasteigne,
Vn trou-madame, vn tourniquet,
Vn très-excellent Perroquet,
Dont minime estoit le plumage,
Qui n'auoit ny voix ny ramage,
Quoy qu'on l'eust instruit à grands soins,
Et pourtant n'en pensoit pas moins.
Mon pere eut les gants ou mitouffles,
De Peleüs, & ses Pantouffles,
Sa monstre, son calendrier,
Son cure-oreille, & son braguier,
Vn pourceau dressé pour des truffes,
A mes compagnons de beaux buffles,
Des viures pour tous les vaisseaux,
Des cheuaux de selle tres-beaux,
Des rameurs à la riche taille,
Et des pescheurs d'huître à l'escaille,
Mon pere Anchise cependant,
Esprit actif, esprit ardent,
Fit apprester nostre equipage.
Chacun ayant plié bagage,
Helenus le prit à quartier,
Et puis luy dit: O vieux routier,
Qui sçais bien le pair & la prairie,
Qui jadis eus l'honneur, & l'aise
D'estre caressé de Venus,
De patiner ses membres nus,
Bref, d'auoir donzelle diuine
Pour legitime concubine.
O toy, deux fois enueloppé,
Mais aussi deux fois échappé
Du sac qui désola Pergame,
par le fer, & par la flame;

Fend si bien les humides flots,
 Et fais agir les matelots
 Avec tant d'art & diligence,
 Que ton fils de diuine essence,
 Tes compatriotes & toy,
 Puissiez bien-tost en grand arroy
 Prendre terre dans l'Hesperie;
 Mais il faut que ta Seigneurie
 Ait grand soin de bien éuiter,
 Et costoyer, sans s'arrester,
 La region qui nous regarde:
 Au nom de Dieu, prens-y bien garde,
 Prens terre de l'autre costé.
 O vieillard, par la pieté
 De ton fils mille fois illustre,
 Puisses-tu viure au moins vn lustre,
 Plus que l'âge de six vingts ans,
 Sans gouttes, & sans mal de dents,
 Sans mal de ventre ou de poitrine:
 Va, mon cher Anchise, chemine,
 Ou plustost vole comme vn dard,
 Adieu, bon soir, car il est tard.
 Andromaque, Dame courtoise,
 Autant qu'une Dame-Françoise,
 Voulut faire aussi ses presens,
 Tres-riches à voir & plaisans.
 D'un bonnet de nuit, de six coëffes,
 D'une serpe à faire des greffes.
 Mon bon pere elle regala:
 Au jeune Ascagne elle bailla
 Vn casquin d'estoffe fine,
 C'estoit taffetas de la Chine,
 Bordé de serge de Beauuais;
 Et quand il feroit le mauuais,
 Vn pourpoint de toile piquée,
 Que cotte de maille appliquée

Rendoit aussi dur qu'un plastron,
 Toy, dit-elle, dont fut parron
 Astyanax mon esperance,
 Qui valoit un Dauphin de France,
 Quand je jette les yeux sur toy,
 Il me semble que je le voy :
 Le pauvre seroit de ton âge,
 Il auoit ton même visage,
 Comme toy, l'air un peu fripon.
 Je te donne son vieil jupon,
 Reçois-le de Dame Andromaque,
 Et le don de cette casaque,
 Le dernier que je te feray,
 Car jamais je ne te verray.
 Ces mots firent pleurer mon pere,
 L'en eus aussi douleur amere,
 L'en pleuray, mon fils en pleura,
 Andromaque se retira
 En un coin pour pleurer à l'aise,
 Et couvrit de pleurs une chaise.
 En ayant tous bien repandu,
 Et nos mouchoirs mouillés tordu,
 Je baisay l'un & l'autre en face;
 Ils me firent laide grimace,
 Chantans, ô regrets superflus !
 Beaux yeux, je ne vous verray plus.
 Je leur dis, trefue de tendresse;
 Separons-nous le temps me presse,
 Vous me faites fendre le cœur.
 Jouissez de vostre bon-heur.
 Vostre fortune est estable,
 Vous n'avez pas une Italie,
 Comme nous, à chercher par tout :
 Le destin qui nous pousse à bout,
 Et les Dieux pour nous seuls fantasques,
 Nous font courir comme des Basques,
 Et nous bernent de mer en mer :

Nous

Nous ne faisons rien que ramer,
 Nos mains autrefois potelées,
 Ont des callus, & sont pelées,
 Comme celles des gens des champs,
 Ou des forçats tousiours gaschans.
 Mais vous, qui n'avez rien à faire;
 Qu'à rire & faire bonne chere,
 Et jour & nuit vous diuertir ;
 Vous avez eu l'heur de bastir
 De vos mains vne neufue Troye:
 Vous voyez avec grande joye,
 Vn nouveau Xanthus tous les jours,
 Et vous gobergez dans son cours.
 Que si nous auons l'Aufonie;
 Comme vous avez l'Albanie;
 Et si nous sommes reconnus
 Dans tous les lieux, dont Dardanus
 Fut Seigneur, nostre grand grand-pere;
 Avec l'ayde des Dieux j'espere,
 Que l'Epirote & le Romain,
 Ainsi que les doigts de la main,
 Seront tousiours vnis ensemble,
 Sans que noise les desassamble.
 Cela dit, leur sautant au cou,
 Et les laissant pleurer leur sou,
 Je m'en allay dans mon nauire,
 Où je fus bien-long-temps sans rire:
 Nos vaisseaux sortis hors du port,
 Fendirent les flots bord à bord.
 De cette dangereuse coste;
 Où nous auions vn si bon hoste;
 Nous costoyasmes les rochers,
 Plus hauts que les plus hauts clochers.
 Qu'on appelle de Ceraunie,
 Le droit chemin de l'Aufonie:
 Et cependant de l'Ocean,

La nuit s'en vint pian pian,
Changea la couleur de nos voiles,
Et parsema le Ciel d'estoiles:
Je ne sçay pas ce que deuint
Le jour alors que la nuit vint,
Je croy pourtant qu'il alla boire.
Nous prîmes terre à la nuit noire,
Et campâmes le long de l'eau,
Chacun estendu comme vn veau.
Tost apres nostre premier somme,
Palinurus, le galant homme,
Se leua pour epiloguer,
S'il faisoit beau temps pour voguer;
S'estant appliqué des lunettes,
Il considéra les Planetes:
Puis s'escria, debout, debout.
Ayant bien examiné tout,
Orion, l'Ourse, les Hyades,
Nous n'auons aucunes bourrades
A craindre, dit-il, sur la mer,
Remettons-nous donc à ramer;
Tout aussi-tost on se rembarque,
Ma nef la route aux autres marque:
Nous n'auions pas long temps vogué,
Que l'Aurore au visage gay,
D'une lumiere zinzoline
En Zinzolina la marine.
Quand le jour vint à s'esclaircir,
Nous vismes de loing espaissir
Sur les confins des eaux salées,
Des montagnes amoncelées:
Achates le premier cria
Si fort, que sa voix s'enroïa:
Courage, je vois l'Italie.
D'une aise, sentant sa folie,
Chacun des nostres fut ravi,
Chacun s'escriant à l'enuy.

Vne

Vne heure au moins cette huée
Fut dans les nefz continuée:
Anchise prit vn gobelet,
Plein d'un vin aussi doux que lait:
Puis ostant bonnet & calote,
D'une action toute deuote,
Il dit. O grands Dieux immortels,
Si jamais seruant vos autels,
J'ay vuidé dignement ma coupe,
Donnez-nous bien le vent en poupe,
Faites-nous aller de droit fil,
Dans ce païs gras & fertile,
D'où sont sortis messieurs nos peres,
Où mon fils apres ses miseres,
Doit se joindre en second Hymen:
Nous nous escliafmes, Amen.
Le vent grossissant son haleine,
Nos navires vogueient sans peine:
A nos vaisseaux s'offrit vn port,
Près duquel, au dessus d'un fort,
Estoit de Minerue le temple.
Je vous diray qu'il estoit ample,
Non que je le sçache autrement,
Mais pour rimer plus aisément.
Les nochers les voiles calerent,
Et de prouë en ce port entrerent.
Ce port à l'abry de tout vent,
Contre les grands flots du Leuant,
Et les efforts de la tempeste,
Se recourbe en arc d'arbaleste.
Quantité de rochers pointus,
Des flots salez tousiours battus,
A l'opposite de l'entrée
Rompent l'effort de la marée;
Et pour n'estre point pris sans vert,
Par les costez il est couuert

De rochers qui font deux chaufslées,
Ou deux murailles auancées ;
Et le temple dont j'ay parlé,
Du port est vn peu reculé.
Quatre cheuaux blancs comme neige,
Ou de carrosse, ou de manege,
Furent, arriuant dans ces lieux,
Le premier objet de nos yeux ;
Ils se repaissoient d'herbe verte.
Mon pere, dont l'esprit à l'erte
De tout tasche à faire profit,
Assez mauuais jugement fit
De ces cheuaux faisant pasture,
Et cria, C'est mauuais augure,
Il ne me plaist point, j'en dy fy,
Ce pais nous fait vn défy,
En mesme temps qu'il nous presente
Entrée & retraitte apparente.
Le coursier, guerrier animal,
Ne prognostique que du mal:
Mais estans attelez ensemble,
Paix & concorde les assemble :
Si bien que j'ay mal deuiné,
Et me suis trop tost estonné.
Certes vn homme de mon aage
Quand il va viste, n'est pas sage.
Après cette reflexion
On se mit en deuotion.
Vne hymne par mon pere faite,
Sur le chant de landerirete,
Fut chantée à Dame Pallas,
Pour nous auoir, recrues & las.
Laislé prendre port en sa terre,
Au lieu de nous faire la guerre:
Et puis d'vn voile sur le nez
Estans tous bien embeguinez,
Suiuant la mode Phrygienne,

A Dame Iunon l'Argienne
 Nous dismes quelques oremus,
 Comme m'auoit dit Helenus:
 Puis apres nous nous rembarquasmes,
 Et finalement nous quittasmes
 Le païs des Grecs dangereux
 Pour nous, déualifez par eux :
 Nous vismes le sein de Tarente,
 D'où l'inuenteur de la Courante,
 Homme certes de grand esprit,
 Vint à Pergame, & me l'apprit.
 Le Dieu qui porte vne massuë,
 Qu'on peint avec barbe touffuë,
 Est tenu pour Dieu gardien
 De ce canton Calabrien ;
 Là la Manne est fort salutaire,
 Dont il se purge d'ordinaire.
 Puis nous vismes Latinia,
 Vis à vis d'icelle il y a
 Le fort de Caulon, & Squillace,
 Où le cœur de frayeur se glace.
 De maint marelot estonné
 De voir son nauire berné.
 Puis apres d'assez loing nous vismes
 Aetna l'abyssme des abyssmes,
 Et nous ouïsmes clairement
 La mer qui hurloit diablement,
 Les flots pleins d'escume & de rage,
 Se brisoient contre le riuage,
 Et le riuage resonnoit.
 Des grands coups que l'eau luy donnoit.
 Tantost en montagnes cornuës
 Elle se leuoit jusqu'aux nuës,
 Peut-estre qu'elle les mouilloit.
 Et tantost elle se brouilloit
 Dans son centre avec son arener.

Mon pere d'une voix hautaine
 Cria, N'est-ce point là le lieu,
 Dont le saint Prophete de Dieu
 Helenus, le compatriote,
 A tant menacé nostre flote?
 Ha ce l'est, foy d'homme de bien,
 Ce l'est, ou je n'y connois rien.
 Tirons-nous viste de ce gouffre,
 Il y put pour nous comme souffre,
 Il y a danger d'abyfmer,
 Si nous ne sçauons bien ramer.
 Ramons donc de cul & de teste,
 Comme au fort de quelque tempeste:
 Et puis que diroit-on de nous,
 Si la mer nous aualloit tous,
 Et ce, par nostre negligence?
 Certes j'en rougis, quand j'y pense,
 Et j'en rougis d'autant plus fort,
 Quand on est noyé, qu'on est mort;
 Quand on est mort, qu'on ne voit goutte,
 Mal-heur que sur tout je redoute:
 Car quand on ne voit goutte, on est
 Graquignolé par qui vous plaist.
 Encor vn coup donc je vous prie,
 Ramons, & ramons de furie.
 Palipure apres ce sermon,
 A gauche tourna son timon,
 Les autres patrons l'imiterent,
 A gauche comme luy volterent,
 Et firent tout ainsi qu'il fit,
 Dont certes fort bien leur en prit.
 Trois fois la mer enflant ses vagues,
 Lors autant à craindre que dagues,
 Vers les Cieux nos vaisseaux poussa,
 Et par trois fois les enfonça
 Vers le plus profond de son onde,
 Que nous sondasmes lors sans sonde.:

Ou pour dire la chose mieux,
 Trois fois nous porta dans les Cieux,
 Et trois fois chez les noires ombres,
 Qu'on appelle Royaumes sombres,
 Dans les vers c'est aller par haut,
 Que mettre le froid & le chaud,
 Le ciel, l'enfer, l'air, & la terre,
 L'eau, le feu, la paix, & la guerre.
 Rimeur qui sçait antitheser,
 Est rauy quand il peut vser
 Ab hoc & ab hac d'antithese;
 Cecy soit dit par parenthese :
 Aussi Rimeur antithesant,
 Est glorieux & suffisant,
 Et pour bien peu deuiant fou d'aise,
 Quand il en fait, bonne ou mauuaise.
 Et tel est, fust-il indigent,
 Qui refuseroit de l'argent,
 Plustost qu'obmettre vne antithese;
 Le tirast-elle hors de sa these.
 Mais ferournons à nos moutons,
 O grande Reyne, & racontons,
 Qu'apres que la mer irritée,
 Eut mainte planete humectée,
 Et maint gros caillou fait rouler,
 Comme maint gros escueil hurler,
 Lassez si jamais nous le fumes,
 Quelque relasche enfin nous eumes
 Des vents, peut-estre aussi lassez,
 Par lesquels nous fumes laissez
 Fort ignorans de nostre route,
 Et qui pis est, ne voyant goute;
 Le long d'un riuage habité
 Par gens remplis de cruauté,
 Les Cyclopes race reuesche,
 Et fort friands de la chair fraische.
 Cette plage a pourtant vn port.

Qui

Qui n'est pas de mauuais abord,
 Allez à couuert de l'orage,
 Mais fascheux pour le voisinage.
 D'Ætna le souspirail d'Enfer,
 Qui fait tout le monde estouffer,
 Quand d'une odeur de poix resine.
 Il emplit la terre voisine;
 Et souuent, ce qui n'est pas jeu,
 D'une grosse gresle de feu,
 Cét Ætna rotte mousquetades,
 Fait entendre des petarrades,
 Capables d'assourdir les gens,
 S'ils ne sont assez diligens
 De se tirer loing de l'orage,
 Et plier vistement bagage,
 Pour esloigner ce trou maudit,
 D'où sortent, à ce qu'on m'a dit,
 Des quartiers de roches fondus,
 Des cendres par tout espanduës,
 Cotrets & fagots alluméz,
 Et brandons anti-parfumez.
 L'on m'a raconté qu'Encelade,
 Pour auoir planté l'escalade
 Contre le palais azuré,
 Est sous ce mont claquemuré:
 Et quand ce vaste corps souspire,
 Et de gauche à droit se retire,
 Que la Sicile horriblement
 Tremble jusqu'en son fondement,
 Et que c'est alors qu'il sanglote,
 Que le mont coups de foudre rotte,
 Et tire des coups de canon.
 Si cette histoire est vraye ou non,
 Elle est tousiours bien inuentée,
 C'est ainsi qu'on me l'a contée.
 Là nous passâmes dans les bois,
 Vne nuit qui passa pour trois,

Tant

Tant elle nous fut ennuyeuse ;
Vne tempeste furieuse
Faisoit la forest retentir,
Et tous nos vieillards esmeutir.
Aux hurlements que nous ouïssmes,
Qu'Ætna pouffoit de ses abysses ,
Nous nous crûssmes tous pris sans vert.
Pas vn volet n'estoit ouuert
Dans le Ciel, & pas vne estoile-
N'estoit cette nuit la sans voile ;
Pas la moindre lune dans l'air,
Au Ciel tout obscur, & rien clair :
Cependant malgré la nuit sombre,
De gros brandons qui perçoient l'ombre,
Nous faisoient voir clair à minuit.
Je ne vous diray rien du bruit,
Mais bien que jamais en ma vie
De dormir je n'eus moins enuie.
L'Aurore vint le lendemain,
Et rendit le temps plus humain ;
Couurant la terre de ses larmes,
(Pour parler langage de carmes.)
Lors sortit d'un bois esloigné
Un portrait fort mal desseigné
Et d'une meschante maniere,
Espouuentail de cheneuiere,
Et qui n'auoit rien sur sa peau,
Qu'en quelques endroits vn lambeau,
Où mainte espine estoit tissüe ,
La peau contre les os cousüe,
Passe, sec & défiguré,
Comme vn corps de terre tiré.
Par ses longs cheveux & sa barbe,
Et par le reste de son garbe,
Il fut de nous Grec reconnu,
Iadis avec les siens venu
A la destruction des nostres.

Voyant

Voyant qu'il nous prenoit pour d'autres,
Et que nous estions Phrygiens,
Il s'escria, l'en tiens, j'en tiens,
Et voulut tetourner arriere.
Mais suiuant sa route premiere,
Il vint en tremblant deuers nous,
Et se mettant à deux genoux,
Il nous dit d'une voix cassée,
D'un debile estomach poussée,
Ces tristes mots en son patois:
O Troyens nobles & courtois,
Par les puissances souveraines,
Par vos parrains, par vos marraines,
Par ce que vous avez de cher,
Espargnez, de grace, ma chair.
Il est vray, ma race est Gregeoise:
Si c'est assez pour auoir noise
Auec vous aux Grecs courroucez,
Dépecez mon corps, dépecez,
De bon cœur je vous l'abandonne,
Et veux que Dieu vous le pardonne:
Je vous seray trop obligé
De n'estre pas tout vif mangé.
Car, hélas! en cette Isle estrange
Même sans sel les gens on mange.
Il nous dit ces mots en pleurant,
Serrant mes genoux, m'adorant.
Je luy dis, qu'il eust bon courage,
Qu'il nous declarast son village,
Son nom, sa fortune, & par où,
Pour faire ainsi le loup-garou,
Il se trouuoit dans la Sicile.
Mon pere, dont l'ame est ciuile,
Autant que celle d'un trompeur,
L'exhorta de n'auoir point peur,
Et dit qu'on luy donnast à boire,
Du pain, du fromage, yne poire.

A ces mots le pauvre estrange
 Fut vû visiblement changer,
 Et reprendre vn peu son visage,
 Et puis il nous tint ce langage,
 Sur son chapeau joiant des doigts.
 C'est bien là ce que j'attendois
 De nation si genereuse,
 Qui deuroit estre plus heureuse:
 Or, Messieurs, pour vous obeïr,
 Je ne veux mon païs trahir,
 Ny mon nom, ny mon origine,
 M'en deussiez-vous faire la mine.
 Je suis d'Ithaque en Ithaqueois,
 Sujet d'Vlyssé le narquois,
 Vn des chefs du peuple d'Aulide:
 Pour mon nom, c'est Achemenide;
 Mon pere Adamaste, vn vieillard.
 Qui n'eut jamais vaillant vn liard,
 Et pourtant est bien Gentilhomme.
 Je ne pû pas me sauuer, comme
 Mes compagnons plus fins que moy,
 Qui me laisserent plein d'esmoy,
 Chez le Cyclope anthropophage,
 Vn grand vilain pour tout potage,
 Qui d'un homme fait vn morceau,
 Et s'en yure comme vn pourceau.
 Il estoit yure quand mon Maistre,
 Qui tient tousiours vn peu du traistre,
 Luy fit vn assez mauuais tour,
 Le priuant pour jamais du jour.
 Or pour reuenir à ce diable:
 En son manoir espouuantable-
 On ne voit que sang respandu:
 Il n'auoit qu'un œil, le pendu,
 Mais cet œil n'est plus dans sa teste;
 Dont jour & nuit il se tempeste.
 C'est vn barbare sans pitié,

Qui ne sçait que c'est qu'amitié:
Quoy qu'il ait bien longue la face,
Dont il fait tres-laide grimace,
Elle tient de celle d'un ours,
Il ne rit point, gronde tousiours.
Ce desolateur de campagne,
Est aussi grand qu'une montagne;
Gourmand si jamais il en fut,
A qui tousiours l'haleine put.
Je l'ay vû, cet espouventable,
Prendre un mien amy par le rable,
Et le croquer comme un lardon,
Et puis, Dieu me face pardon,
Prendre un autre sien camarade,
Et luy donnant une froissade
Contre le roc de sang enduit,
Comme l'autre, sans estre cuit;
Le gober en huître à l'escaille,
Os, chair, tripes, boudins, entraille.
J'ay vû le sang se respendant,
A ce grand diable à la grand dent,
Le long de sa sale maschoire,
De sang figé rougeastre & noire,
J'ay vû des membres palpiter,
Et dans sa bouche s'agiter
Tandis qu'il les mangeoit encore:
Il ne mange pas, il deuore,
Et le fait tant auidement,
Qu'il s'engouë ordinairement:
Vlysse affligé du carnage
Que faisoit cét Anthropophage;
Ce maistre aualeur de pois gris;
Reprend à la fin ses esprits:
Il fait si bien, qu'il apriuoise
Cette nature rabageoise;
Luy fait boire du vin sans eau;
Non pas pour un simple tonneau,

Mais

Mais le second & le troisiéme:
Si bien que le grand Polypheme
Beuuant à tire-larigor,
Aprés maint hocquet, & maint rot,
Se mit tant de vin dans la teste,
Qu'à la fin cette grosse beste
S'endormit, qu'il n'en pouuoit plus.
Lors il fut de son œil perclus,
Aussi grand qu'une table ronde,
Au bon-heur de tout nostre monde,
Excepté de moy malheureux,
Qui ne pûs me sauuer comme eux.
Mais qu'attendez-vous dauantage?
Quittez ce dangereux riuage;
Si vous aymez bien vostre peau,
Cherchez vostre salut dans l'eau.
Ce vilain a plus de cent freres,
Qui certes ne luy cedent gueres,
Tous bien beuuant, & bien mangeant,
Comme luy deuorant les gens;
S'il faut qu'ils sentent la chair fraische,
Il n'est homme qui vous empesche
D'estre croquez en vn clin d'œil,
Dont certes je mourrois de dueil.
Par trois fois la Lune cornue
Sur nostre horizon est venue
Depuis que je suis dans ces bois,
Où je me cache en tapinois.
Je voy tous les jours ces grands hommes,
La peste du siecle où nous sommes,
Qui gardent leurs boucs & brebis,
Couverts de peaux au lieu d'habits.
Lors mon sang de frayeur se glace,
Et je sens allonger ma face,
Sans hyperbole, d'un empan;
Mon viure n'est qu'un peu de glan,
Et quelquefois du fruit sauage;

Grace

Grace à monsieur l'Anthropophage,
Je meurs de faim le plus souuent,
Le moindre bruit que fait le vent,
Je pense que c'est Polypheme.
Certes ma misere est extrême,
Et jamais on ne patit tant,
Et vous mesmes en m'escoutant,
Vous faites aussi triste mine,
Que moy sur qui la peur domine.
Depuis ce temps-la dans ce bord
Aucun nauire n'a pris port.
Lors que j'ay veu vos banderoles,
J'ay fait quatre ou cinq caprioles,
Et puis à pas de pantalon,
Me frapant le cul du talon,
Je suis venu vers vous mes braues:
Faites de moy des choux, des raues,
Tuez-moy, ne me tuez pas,
Dans la vie, & dans le trespas,
Je trouueray mon auantage,
Pourueu qu'en ce maudit riuage
Je ne serue point d'aliment
A ce detestable gourmand.
Comme il contoit son auenture,
Cette effroyable creature,
Ce prodigieux animal,
Dont il auoit dit tant de mal,
Parut au haut d'vne colline
Avec sa taille gigantesque;
Chacun de nous crut voir marcher
Quelque mont, ou quelque rocher.
Il s'en venoit vers le riuage,
Le tres-mal plaisant personnage,
Gros, mal basti, sale, velu,
Et n'auoit qu'un œil, le goulu,
Et duquel il ne voyoit goutte,
Ce qui le faschoit bien sans doute.

Vn grand pin seruoit de baston
 A ce Polypheme glouton,
 Et pourtant il plioit encore,
 Tant pesante estoit la pecore,
 Et portoit pendu, le grand fou,
 Vn grand jeu d'orgues à son cou,
 Qui luy seruoit de cornemuse.
 Vne grande troupe camuse
 De brebis venoit apres luy,
 Dont il soulageoit son ennuy,
 Depuis qu'Vlyse d'une pique
 Auoit éuente son optique.
 Ce loup, plustost que ce berger,
 Qui sçauoit les hommes manger,
 Bien mieux qu'aucun qui fust au monde,
 Entra jusqu'aux genoux dans l'onde,
 Dont il laua son œil percé,
 Non sans auoir les dents grincé,
 Car du sel marin la morsure
 Irritoit bien fort sa blessure,
 Apres auoir long-temps lauë,
 Et relauë son œil creué,
 Il nous monstra sa fesse nuë,
 Et fit quelque allée & venüe
 Dans la mer, & mesmes il vint
 Aupres de nous le Quinze-vingt.
 La mer, telle estoit sa stature,
 Ne luy venoit qu'à la ceinture:
 Nous pensâmes deuenir sous,
 Quand nous vismes aupres de nous
 Le plus puissant paillard du monde,
 Se promenant ainsi dans l'onde.
 Quelques-vns, au lieu de tirer
 Leur ancre, afin de démarer:
 Ne firent qu'en couper la corde,
 Criant bien fort, misericorde.
 Le vilain qui les entendit,

Et

Et qui la chair fraîche sentir,
 Tourna vers eux son grand visage,
 Et s'il eust crû lors son courage,
 L'animal s'en venoit à nous,
 Et nous estions fricassiez tous.
 Mais nous eûmes pour gardienne
 La bonne mer Ionienne.
 Il ne put aller plus avant,
 Dont de rage presque cteuant,
 Ce malin fit vne huée,
 Dont la mer aussi secouée
 Qu'elle l'est par les Aquilons.
 Se boursoufla par gros bouillons :
 L'Italie en fut estonnée,
 Et l'Ætna par sa cheminée
 Fit sortir des gemissemens,
 Ou bien plustost des hurlemens,
 Horrible écho de la huée
 De cette personne endiablée.
 L'oubliois que le pauvre Grec,
 Tres-passe, tres-maigre, & tres-sec,
 Fut receu de nous avec joye,
 Quoy qu'un des destructeurs de Troye,
 Aussi l'auoit-il merité.
 Par sa grande calamité.
 Lors l'on vit les monoculistes
 Venir par différentes pistes,
 Aucun de ces enfans d'Ætna
 En son grand front plus d'un œil n'a.
 Iugez de leur grandeur extrême
 Par celle du grand Polypheme:
 Peu differente estoit la leur
 De celle de ce grand voleur.
 Onc mortel n'a vû, ce me semble;
 Moins d'yeux & plus d'hommes ensemble;
 Ils venoient furieusement,
 Et pourtant assez lourdement;

Quoy

Quoy que démesurez colosses
Ils me parurent vn peu rosses.
Des Cypres allans & venans,
Ou des grands chesnes cheminans,
Du bois, qu'aucun fer ne prophane,
De Iupiter ou de Diane,
Sont la seule comparaison,
Qu'on puisse faire avec raison,
De ces messieurs Anthropophages:
Au reste tous vilains visages,
Quand ils eussent eu deux bons yeux,
(Ils n'en auoient qu'vn chassieux)
Jamais n'eussent esté leurs faces,
Que patrons à faire grimaces.
Quand ils approcherent la mer,
Ce fut à nous à bien ramer;
Mais quelle fut nostre imprudence?
Sans auoir non plus souuenance
De nostre bon Prince Helenus,
Ny des discours par luy tenus,
Que si ce bon compatriote
N'eust jamais connu nostre flote,
Nous allions fort bien nous fourrer,
Sans nous en pouuoir retirer,
Tout droit dans la mer defendüe,
Qu'à si souuent nef s'est perdue.
Mais quand on a peur, pour vn peu
On se jetteroit dans vn feu:
Et nous craignons Charybde & Scyle
Moins que ces monstres de Sicile.
Boreas vint tout à propos,
Qui nous mit l'esprit en repos,
Il venoit de deuers Pelore,
Il me semble qu'il souffle encore,
Tant j'ay gardé le souuenir
Du bien qu'il nous fit à venir.
Ce bon vent, des vents le plus sage,

Nous

Nous porta par delà Pantage,
Le golphe dit Megarien,
Et le bas Thapſe, en moins de rien.
Le pauvre Grec Achémenide
Nous ſeruit en ces lieux de guide,
Et me diſoit tous les endroits
De la coſte, en ſon Ithaquois,
Dont j'eus grand plaifir de m'inſtruire,
Vis à vis du fleuve Plemmyre,
Affez pres du fameux deſtroit,
Où le nocher le plus adroit
A peur de Charybde & de Scyle,
On rencontre vne petite Iſle,
Dont Ortygie eſt le vieil nom,
Autresfois ville de renom,
Dont Madame la renommée
Chofe bien eſtrange a ſemée.
Maint Autheur, animal mentant,
Nous donnant pour argent contant,
Que le fleuve Alpheus d'Elide,
Sans lanterne, flambeau, ny guide,
Par certain ſentier ſouſterrain,
Luy, ſes poiſſons, & tout ſon train;
Y va voir la ſource fameuſe
Areuſe, ou bien Aretheuſe,
Et ſ'y joint en bonne amitié:
Puis meſlant tous deux par moitié,
Leurs eaux auſſi claires que vitres,
Tous leurs poiſſons, toutes leurs huiſtres,
Ils ſe vont rendre dans la mer,
Ce qui les fait bien renommer.
En cette Iſle où terre nous priſmes,
Quelques ſacrifices nous fiſmes,
Où maint animal fut ſaigné,
Comme on nous l'auoit enſeigné.
Nous viſmes la graſſe campagne,
Que la riuiera Elore baigne,

Et

Et de Pachin les hauts rochers,
Si connus de tous les nochers :
Pres de là l'on voit Camerine,
Des champs des Gelones voisine,
Et le lieu qu'on nomme Gela,
Pour vn fleuve passant par là.
Nous vismes la haute Agrigente,
Qui de si bons cheuaux enfante,
Seline fertile en palmiers,
Et les rocs craints des nautoniers,
Du promontoire Lilybée,
Où mainte nef est absorbée :
Et puis Drepane me receut,
Port funeste, où ma constance eut
A s'exercer de bonne sorte,
Quoy que j'aye l'ame assez forte,
J'eus bien de la barbe à peler,
Et trouuay bien à qui parler.
Hélas ! j'y perdis mon bon pere,
(Souuenir qui me desespere.)
Il mourut le pauvre vieillard,
S'il eust voulu mourir plus tard,
Il auroit vescu dauantage ;
Il mourut, & c'est grand dommage.
Il m'aimoit, je l'aimois autant,
Et plus mesme qu'argent contant :
Il mourut, & c'est tout vous dire,
Depuis l'on ne m'a point vû rire,
J'en ay pris le noir hœcqueton,
Et n'ay plus rasé mon menton.
Cher papa, qu'auiez-vous à faire
Vne action si remeraire.
Et qu'on ne peut faire deux fois ?
En vous seul je me consolais
De ma fatale destinée :
Puisque la vostre est terminée,
Que pour moy vous estes perdu,

Et ne me ferez point rendu,
 Si quelqu'un me vouloit apprendre,
 Comme il faut faire pour se pendre,
 Tres-volontiers de sa leçon
 Je luy payerois la façon :
 Au lieu que pauvre exilé j'erre,
 De mer en mer, de terre en terre.
 Helas! le Prophete Helenus
 Dans les discours qu'il m'a tenus,
 Ne m'en dit pas vne parole,
 Ni mesme Celéno la fole :
 Et neantmoins cette guenon
 Me dit au nez pis que mon nom,
 Et me menaça de famine,
 L'irraissiable vermine.
 Ayant mis mon pere en repos,
 Et le vent soufflant à propos,
 J'abandonnay ce lieu funeste:
 Madame vous sçavez le reste.
 Le vent devenu furieux
 M'a fait aborder en ces lieux,
 Où ma flotte bien hebergée,
 Vous sera tousiours obligée.
 Ainsi finit maistre Æneas,
 De conter si long-temps si las,
 Et si pressé de faire vn somme,
 Qu'il baailloit tousiours, le pauvre homme:
 Dame Didon baailloit aussi,
 (Car qui voit baïller, fait ainsi)
 Non moindre sur la baïllerie,
 Qu'auoit esté l'yurognerie.
 Tyriens & Troyens baïlloient,
 Quelques-vns debout sommeilloient,
 A tous momens testes baïssées
 En sursaut estoient rehaussées.
 Enfin chacun chercha son lit.
 Je vais au mien, car j'ay tout dit.